

**Siunnersuut: Siusinaartumik pensionisiat pillugit Inatsisartut peqqussutaata
allanngortinneqarnissaa pillugu Inatsisartut peqqussutaat nr. xx, xx 2010-meersoq**
(Isumaginninnermut Naalakkersuisoq)

Saqqummiussiissut
(Isumaginninnermut Naalakkersuisoq)
Siullermeerneqarnera

Nuannaarutigaa Naalakkersuisut sinnerlugit siusinaartumik pensionisialinnut aningaasaqarnikkut inuuniarnerminni atugarisaasa pitsanngortinneqarnissaannut Inatsisartut peqqussutissaannut inatsisissatut siunnersuut manna saqqummiussinnaagakku.

Sivisuallaarujussuarmik siusinaartumik pensionisiallit qaangiataaginnarneqartarsimapput. Taamaattumik Naalakkersuisunit pingaartittorjuussuvarput, inuiaqatigiinni inoqatitta taakku inuunermikkut pitsaasunik atugassaqartinneqarnerisa pitsanngortinneqarnissaat. Tassunga atatillugu Naalakkersuisunit nalilerparput, siusinaartumik pensionisiallit atorfissaqartikkaat aningaasaqarniarnikkut qaffatsinneqapallannissartik, tassami inuiaqatigiinni inoqativut taakku aningaasaqarniarnikkut 1998-imiilli pingaartinneqarsimangimmata. Taamaammatt siunnersuutigineqassaaq, siusinaartumik pensionisiantut aningaasat qaammammut 1000 kroninik qaffanneqassasut. Ilanngullugu Naalakkersuisunit siunnersuutigineqarpoq, siusinaartumik pensionisiat aningaasartaat siunissami ingerlaavartumik akit qaffakkiartornerat naapertorlugu iluarsineqartassasut. Tamanna siusinaartumik pensionisiallit aningaasaqarnikkut atugarisaannik pingaaruteqartumik pitsanngoriartitsineruvoq, tassami taamaasillutik aamma siunissamut aningaasaqarniarnikkut aalajaatsumik ingerlatsisinnanissaat qulakkeerneqassammat.

Ilanngullugu Naalakkersuisut siunnersuutigaat, toqusoqarsimatillugu inoqatigisap aapparissalluunniit qimataasup toqusimasup pensionisiassaat pissarsiarisassagaat toqusoqareernerata kingorna qaammattini marlunni.

Inatsisissatut siunnersuummut tassunga tunuliaqutaavoq Inatsisartut UKA 2009-mi immikkoortoq 44-mi aalajangiisimanerat tassalu 2010-mi Naalakkersuisut peqquneqassasut utoqqalinermi pensionit pillugit malittarisassanut allannguutissatut siunnersuuteqaqqullugit. Tamanna iluatsillugu Naalakkersuisut aalajangiuppaat, malittarisassaq taanna siusinaartumik pensionisijaarsimasuni qimatanut aamma atuutissasoq.

Ilanngulluguttaaq siunnersuutigineqassaaq oqaatsitigut erseqqissaasoqarnissaa § 18 kiisalu § 21-mi kalaallisut danskisullu saqqummiunneqartut naapertuuttuunissaat qulakkeerniarlugu.

Naalakkersuisut arajutsisimangilaat, siusinaartumik pensioneqarnerup tungaatigut iluarsivittoqarnissaanik aamma pisariaqartitsisoqartoq. Pineqartumili iluarsivittoqarnissaanik apeqqutip aallartinneqannginnerani, Naalakkersuisunit siullermik Akileraartarnikkut Atugarissaarnikkullu isumalioqatigiissitamit kaammattuutigineqartut naatsorsuutigisatut 2011 aallartisimalerpat saqqummiunneqartussat sularineqaaqqaassapput.

Taamatut oqaaseqarlunga siunnersuut Inatsisartunit akuersaartumik suliassanngortippara.

